

Minister Dangui Oduber:

‘Lo introduci un linea Central di contacto pa personanan cu problema mental y adicción’



ORANJESTAD – Recientemente minister Dangui Oduber a trece dilanti cu lo bay atende cu e problematica di persona cu problema mental y adicción. Gobierno lo bay introduci un ‘Linea Central di contacto’.

E mandatario a splica cu na comienso di e aña a institui un ‘stuurgroep’ cu e tarea pa haci un inventarisación di

kico ta e situación y tambe trece sugerencianan dilanti con pa atende cu tur e retonan cu tin. Na e momentonan aki e stuurgroep a finalisa su tareanan y a presenta diferente sugerencianan cu e ministerio di Salubridad Público lo bay ehecuta.

Segun e comunicado, actualmente tin un fragmentación den e manera cu ta atende e problema aki, e obhetivo di

e ministerio ta pa centralisa y integra. Tin esunnan cu tin problema mental y tin esunnan cu tin problema di adicción, pero bo ta haya esunnan cu tin ambos problema.

Tur e personanan aki ta problema pa nan mes, problema pa nan familia y problema pa sociedad. E situación aki tin atención debido di gobierno y ta pone esaki como prioridad, no solamente bisando

esaki, pero tambe poniendo acción tras di nos palabra, segun e minister. Gobierno lo pone placa tambe pa asina por duna cuidado na e personanan aki.

Linea Central di contacto (central meldpunt)

E idea di e central meldpunt ta pa tin un number central caminda cu familia, amigonan, conocinan por yama y informa Social Psychiatrische

Dienst (SPD). SPD ta un unit cu ta cay bou di DVG cu a wordo lubida durante e último 8 añanan aki. Un departamento cu di 21 trahado a wordo corta te cu 5 trahado, asina e Mandatario a declara durante e conferencia di prensa. SPD ta bay percura pa bin cu ‘fact teams’.

Fact Teams

Fact teams ta un ekipo cu ta bay sali riba caya y brinda e cuidado y servicio na tur e personanan cu ta sufrir di problema mental y adicción. Por ehempel ora cu SPD haya yamada, e fact team aki lo sali bay na e dirección y haci un opname y mira e situación. Si ta un situación di tal gravedad e persona lo mester wordo interna na Respaldo. Si ta trata di un adicto e tin cu sigui un tratamiento pa adicción. Si e persona ta sufrir di ambos e fact teams lo scoge e problema mas serio na e momento eynan pa atende cu ne. Esaki ta loke e trabou di e fact team lo ta, segun minister Dangui Oduber. Gobierno lo bay reenforza e departamento di SPD bek pa asina nan por funciona manera mester ta. A percura den Social Crisis Plan caba pa tin fondo disponible pa busca mas psiquiatra, psicólogo y miembro di e fact team pa haci e central meldpunt aki posibel. Y asina aki minister Dangui Oduber ta sigui cumpli cu e plan di gobernación.